

UVODNIK

Ovaj broj „Znakova vremena“ posvećujemo akademiku Avdi Sućeski, jednom od najznačajnijih osmanista Bosne i Hercegovine u prošleme stoljeću, uzoritom intelektualcu, znanstveniku i istraživaču, koji je svojim brojnim stručnim radovima ostavio dubokoga traga u pravno-historijskoj nauci ne samo kod nas, nego i u široj regiji.

U odjeljku *Religijske teme* donosimo tekst čuvenoga muslimanskog učenjaka Ibn 'Arebija, koji iz povlaštenoga statusa i perspektive Selmana Farisija promišlja Ehli-bejt i njegov značaj u duhovnoj i religijskoj praksi muslimana.

U trećem odjeljku *Teološko-pravne teme* objavljujemo tekst Huseina Kavazovića, reisu-l-uleme Islamske zajednice u Bosni i Hercegovini, u kome se analiziraju i izlažu teološke pretpostavke odnosno izvori prirodnog prava mu'tezila, jedne od najkontroverznijih, najinteresantnijih i najvažnijih klasičnih muslimanskih teoloških škola mišljenja.

Odjeljak *Međureligijski dijalog* sadrži tekst Marka P. Đurića u kome autor promišlja dijaloške perspektive i mogućnosti Srpske pravoslavne crkve u odnosu na zapadno kršćanstvo i sunijski svijet islama.

U petom odjeljku *Refleksije* donosimo dva teksta. U prvome tekstu Saeid Abedpour kritički reflektira Gazalijeve poglede na tesavvuf i filozofiju, dok u drugome Senella Krehić-Fočak promišlja, u okviru komunikološke nauke, raznolike oblike komunikacije u sufizmu.

Šesti odjeljak *Ogledi* sadrži tekst Amile Šljivo Grbo u kojemu se govori o medijskoj legislativi Europske unije i njenim konsekvencijama na zakonodavstvo odnosno medijski prostor Bosne i Hercegovine.

U sedmom odjeljku *Pravo i društvo* objavljujemo tekst iranskoga autora Amjada Javdana u kome se razmatraju vanredne mogućnosti i oblici žalbenoga postupka na izrečene presude u pravnom sistemu Islamske Republike Iran, te njihove socijalno-društvene implikacije.

U odjeljku *Politološko-pravne teme* donosimo dva teksta. U prvome tekstu Džemal Najetović piše o problemima vezanim za državnu granicu Bosne i Hercegovine sa Republikom Srbijom, u drugome Meldijana Arnaut Haseljić analizira i portretira Ratka Mladića kroz sadržaj optužnice i izrečene presude.

Na kraju donosimo dva prikaza knjiga. Orhan Jašić predstavlja knjigu Amira Muzura i Ive Rinčić, *Van Rensselaer Potter i njegovo mjesto u povijesti bioetike*, a Haris Hadžić knjigu *Akaiidska učenja Ebu Hanife*, autora Adnana Silajdžića i Samira Beglerovića.

Adnan Silajdžić